

摘藻堂四庫全書薈要

集部

欽定四庫全書薈要

集部

御定歷代題畫詩類卷二百

七八

詳校官原任主事

臣李斯咏

欽定四庫全書薈要

御定歷代題畫詩類卷一百七目錄

獸類

杜秀才畫立走水牛歌

唐顧況

述韋昭應畫犀牛

唐儲光羲

觀胡九齡負外畫牛

宋韓琦

觀黃介夫寺丞所收丘潛畫牛

宋梅堯臣

毛老鬪牛圖

宋文同



題李亮功戴嵩牛圖 宋黃庭堅

游昭牛圖 宋陸游

范牛 宋樓鑰

題潘溫叟家藏戴牛畫卷 宋郭祥正二首

題牛圖 宋戴復古

戴嵩畫牛 金楊雲翼

韓晉公畫蒼牯出水圖 元王惲

題水牯圖 元王惲

戴嵩畫牛圖 元王惲

畫牛 元程鉅夫二首

李唐牛 元袁桷

畫牛 元馬祖常二首

畫牛 元僧大訢

題牛 明郭厘

題畫牛 明林環

題畫牛 明金幼孜二首

題朱給事所藏牛圖 明楊士奇

題畫牛圖 明楊旦二首

題牛次韻 明程敏政

畫牛 明何孟春八首

題畫牛 明僧覺澄

牛圖 明僧清澁

題紀武子所藏老融二牛圖 宋樓鑰二首

題范道士二牛圖 宋范成大

題高都事戴嵩二牛圖 元黃清老

三牛圖 元歐陽玄

題劉景明百牛圖扇面 宋楊萬里

江參百牛圖 元鄧文原

題江貫道百牛圖 元白珽

百牛圖歌 元舒頔

題黃啓晦百牛圖 明林環

題百牛圖 明陳振

書百牛圖後

明丘濬

蜀女繡牛圖

元袁桷

題錦屏史仙繡牛圖

元吳澄三首

題四羊圖

宋王阮

恭題靈羊圖

明謝承舉

趙王孫墨羊圖

明偶桓

黃荃芙蓉乳狗

元虞集

海狗窠石圖

元袁桷

題窠石海狗圖 元柳貫

題犬 元貢性之

題犬 明張鳳翼

題李迪畫犬 明高啓

趙南伸寄王樸畫猫犬戲爲之賦 宋樓鑄

狸奴畫軸 金王良臣

醉猫圖 元元好問二首

題武仲經知事獅猫畫卷 元程鉅夫

何尊師醉猫

元素桷

王振鵬狸奴

元素桷

題睡猫圖

元柳貫

題猫

元丁鶴年

芙蓉白猫手卷

元錢惟善

題宋徽宗畫狸奴銜魚圖

元錢惟善

題畫猫

明劉基

題茅山道士藏徽宗畫猫食魚圖

明解縉

豕圖行
元戴良

欽定四庫全書薈要卷一萬九千二百十五

集部

御定歷代題畫詩類卷一百七

獸類

杜秀才畫立走水牛歌

唐
顧況

崑崙兒騎白象時時鎖著獅子項奚跨馬不搭鞍立
走水牛驚漢官江村小兒好誇騁脚踏牛頭上牛領淺
草平田擦過時大蟲著鈍幾落井杜生知我戀滄洲畫
作一障張牀頭八十老婆拍手笑妒他織女嫁牽牛

述韋昭應畫犀牛

唐 儲光義

遐方獻文犀萬里隨南金大邦柔遠人以之居山林食
棘無秋冬絕流無淺深雙角前嶄嶄三蹄下駸駸朝賢
壯其容未能辨其音有我哀烏郎新邑長鳴琴陞閣飛
嘉聲丘甸盈仁心

觀胡九齡負外畫牛

宋 韓琦

丹青之筆奪造化能者幾何登品錄蛟龍獐惡鬼神怒
畫工不接時人目有形之物至者稀是否難欺衆所矚

絳臺胡椽文章外偏向畫牛其好酷海內馳名三十年
得者珍藏過金玉老來纔始著青衫養親不及朝家祿
前日野服忽相過云訪恩知走京轂微風入指未能畫
示我蠟本數十幅采撫諸家百餘狀毫端古意多含蓄
闕者取力全在角臥者稱身全在腹立者髣髴精神慢
背者分數頭項促行者動作皆得羣乳者顧視真憐犢
當流汨戲益自在欲走或疑猶蓄縮從容飲齧得天真
荷鞭時有童兒牧或橫一笛坐牛背便是無聲太平曲

江天雨雪易溟濛風勢掀號摧古木敬斜蓑笠趁牛歸
蕭疎暮景煙村宿奇哉胡掾老筆不可到戴叟重生須
死伏吾觀諸牛之態雖盡妙尚有所遺思未熟牛於生
民功最大不畫牛功牛亦辱胡君胡君聽我言別選輕
綃成巨軸寫出區區耒耜勤貴知天下由吾方食足

觀黃介夫寺丞所收丘潛畫牛

宋梅堯臣

丘畫吳牛希戴嵩吳牛角偃彎如弓老牯望犗望母
母下平坡離牧童牧童吹笛坡頭坐古樹蕭騷葉戰風

黃君買畫都城巾不惜滿貫穿青銅賣從誰家不肖子
傳自幾世賢卿翁今時貴人所尚同競借觀翫題紙窮
紙窮磊落見墨妙東府西樞三四公應識古人丹青蹟
又辨古原本闕於物通一毛一尾不取次豈以後代爲盲聾
請推此意佐國論況乃聖德同堯聰

毛老鬪牛圖

宋文同

牛牛爾何爭於此輒鬪怒長鞭鬧兒童大炬走翁嫗蒼
樓八九子駭立各四顧何時解角歸茅舍江村暮

題李亮功戴嵩牛圖

宋 黃庭堅

韓生畫肥馬仗下有輝光戴老作瘦牛平生一作田千頃荒

穀鯨告主人實已盡筋力乞我一牧童林間聽橫笛

游昭牛圖

宋 陸 游

游昭木石師李唐畫牛乃是其所長出欄初聽一聲笛
意氣已無千頃荒客居京口老益困衣不掩脰鬚眉蒼
時時弄筆眼力健蹄角毛骨分毫芒我無沙堤金絡馬
拂拭此幅喜欲狂乞骸幸蒙優詔許置身忽在煙林傍

日落飲牛水滿塘夜半飯牛天雨霜
但醫濯藥美水草
老巫訶禁祓不祥願我孫子勤農桑
願汝生犢筋脉強
碓聲驚破五更夢歲負玉粒輸官倉

范牛

宋樓鑰

人問吾何愛一牛范仙真筆倍風流
繩牽雖未如自放
猶勝更著金籠頭

題潘溫叟家藏戴牛畫卷

二首

宋郭祥正

不辭耕遍主家田日暮歸時欲飽眠
渡盡驚波莫回首

後來猶苦牧兒鞭

茫茫陂水暮秋天
乍脫耕犁未得眠
矯首衝波方盡力
牧兒何用更揮鞭

題牛圖

宋
戴復古

牡丹花下連宵醉
今日閑看黑牡丹
得此躬耕東海曲
一貧無慮百憂寬

戴嵩畫牛

金
楊雲翼

春草原頭雨濕煙
夕陽渡口水吞天
披圖坐我風蓑底

一夢長林二十年

韓晉公畫蒼牯出水圖

元王惲

蒼牯水所喜泳游溪水中物情便所適頓立不我從但
見鼻吻長可知力挽雄小大制有法驅牽任此童東臯
夜來雨催辦耕稼功一飽賴爾力高廩歌年豐畫師亦
敦本大意與訓同吮墨變化質指爲洛花叢妙哉韓相
筆遠意老明農

題水牯圖

元王惲

姚黃魏紫動遊觀何似田家黑牡丹萬有困倉由爾出
論功省得畫圖看

戴嵩畫牛圖

元 王 惲

吳儂四時耕瘴煙吳牛見月心茫然戴郎此本極閑逸
筆意遠出韓公前解縻脫鞅春事畢江皋野草香芊綿
歸鞭影亂散平楚考牧大似斯干篇因渠喚起歸耕興
夢到西山谷口田

畫牛 二首

元 程鉅夫

東華塵裏度年年每見春風憶故園曾是江南新雨過
閑看稚子引烏犍

穀鰥春來苦羣兒未必知良工知有意好寫駕犁時

李唐牛

元袁桷

穠稔原空蟋蟀吟秋來乞得自由身平蕪又見粼粼綠
復與田翁共苦辛

畫牛
二首

元馬祖常

龍具春來掛屋廡清泥過腹雨耕勞田間獨仰聽風鼻

不信空山野兒號

江岸騎牛襜褕翁夕歸對婦詫田功
世間無客曾相識
惟見驚飛幾鴈鴻

畫牛

元僧大訢

草煖犢子肥牧閑牛耳濕
誰知荷蓑翁風雨租稅急

題牛

明郭廕

鳥下南山已夕人間春草初齊爲問上流何處白雲遙
起前溪

題畫牛

明林環

春滿空原草色深
烏犍追逐過遙岑
半村殘照人家晚
似恐天寒去路陰

題畫牛

二首

明金幼孜

服箱力穡不知年
報主多情祇自憐
好是野田春種後
飽肥芳草臥深煙

牧童原上催歸急
遠樹微茫帶夕曛
前日東郊曾扈從
野人牽進沐恩頻

題朱給事所藏牛圖

明楊士奇

宛宛柳絲柔，絲絲芳草綠。
三月耕犁間，春田雨新足。
紛紛陌上騾，青驄獨占溪南坐。
黃犢

題畫牛圖

二首

明楊旦

東風吹老綠楊枝，可是春郊罷耒時。
帶雨細齧原上草，夕陽歸路向遲遲。

南畝功成便退身，中流遊泳任天真。
牧童何處空江晚，清世應無扣角人。

題牛次韻

明程敏政

已銷金甲事春農無復全齊火戰功惟有牧兒相伴在
一山桃樹半溪風

畫牛

八首

明何孟春

牧兒騎背穩如舟跨谷騰岡復度流老我犁耙手曾執
能知此畫是真牛

春到西疇日尚寒公家地力幾時殫一生辛苦依農業
肯作豪家黑牡丹

抖擻荷蓑夢始醒老健何事鬪林垌此中竹石雖無主
留取相依歲晚青

煙蓑雨笠出山隈白水收犁薄暮纔同輩解忘耕作苦
盡從牛背唱歌回

恥將刀劒誤園田歸買耕牛不論錢昔日我聞龔北海
而今郡吏更誰賢

雪壓春郊積雨餘蓑衣濕透未能除牛飢臥甌田邊草
誰復來翻角上書

扣角曾傳寧戚歌
南山白石正嵯峨
躬耕亦有南陽客
梁甫吟成奈爾何

日耕百畝肯言功
禾黍今看歲又豐
但得主人倉廩實
不愁無稭飼西風

題畫牛

明僧覺澄

林下逍遙飽則眠
何人能似爾安然
因思昔日陶弘景
金作籠頭不易牽

牛圖

明僧清楚

春光寂寂煙暈晴春風淡淡波痕明溪南溪北小坡平
我却騎牛向溪曲溪曲嫩草嫩如玉記得當時農事足
倒指數來三十年今觀此圖猶宛然只多舐犢雙崖邊

題紀武子所藏老融二牛圖

二首 宋

樓

鑰

佳哉淡墨埽人牛一笛橫風各自由平日深知焉用劇
如今但欲老西疇

烏犢離立意逶遲鞭策俱忘取次歸駭犢跳風却仍顧
老融於此露天機

題范道士二牛圖

宋 范成大

西疇滌場靜無塵
原頭遠牧秋草春
一牛疾行離其羣
一牛返顧如怒嗔
目光炯炯寧而馴
點綴毫末俱逼真
不顛不狂筆有神
妙哉吾宗散仙人

題高都事戴嵩二牛圖

元 黃清老

東風吹浪翻平林
吳江咫尺移春陰
牧童曉出不知雨
日暮歸去清溪深
一童驅牛涉古岸
草煙慘澹迷目觀
雙蹄湧出層水間
蒼峽蹴翻石雲斷
一童踞策溪中流

溪風不動波悠悠恍然顧影驚自失尚疑身跨蒼龍遊
平瀾遠峰結寒色至今宇宙留墨迹可憐三子人不識
我欲問之漢津客

三牛圖

元
歐陽玄

兩豎騎牛過遠村一童橫笛弄黃昏老僧正解荆舒字
坐愛三牛了不奔

題劉景明百牛圖扇面

宋
楊萬里

吉語聞田父新年勝故年借儂百穀鰲雨裏破荒田

江參百牛圖

元 鄧文原

濕濕羣行四百蹄
畊犁初罷樂相隨
春風綠遍川原草
回首牧人知是誰

題江貫道百牛圖

元 白 珽

幾年散放桃林後
餘四百蹄猶可騎
攬鏡挂書多事在
能騎唯有一凝之

百牛圖歌

元 舒 頔

繫誰畫此百牛圖
綃素淋漓懸兩壁
摩挲細認角頭奇

無乃戴嵩留幻墨牧童騎策過前村春樹陰陰春草碧
雲收霧斂山花明遠近巔崖翠光溼平湖斷岸水淺深
皺縠粼粼如展席犢眠草間牛不乳飢齧青芻礪蒼石
或飲或浴雲滿身物我相忘祇自得橫斜體態百頭殊
牧豎籠雛戲阡陌有時背上顛倒騎細雨斜陽橫短笛
時平放爾桃林中布穀催耕苦相迫嗚呼比年兵革彌
天下千畦萬隴生荆棘只今農父把鋤犁處處開耕皆
爾力斗米三錢戶不扃四海蒼生無菜色

題黃啓晦百牛圖

明林環

昔我東山居荷鋤事農耕三時有暇日放牛滿郊垌依
依芳樹陰萋萋煙草青野薈恣所往愛此風日晴遠坡
每羣趨空原時獨行前溪足新雨牽飲上流清牛性日
已馴牧閑無所營捲蘆作短笛吟雜童謳聲相將晚來
歸月色孤村明以茲樂生事外物焉足撓別來幾春秋
石田想榛荆維魚每入夢彷彿東臯平披圖見犍犢蔽
野何縱橫吟望夕陽山因之發遐情

題百牛圖

明陳張

華山歸牧後南畝釋耕時
大地郊原衍方春水草宜功
成無捆載力剩向驅馳飲澗遙呼犢維羣
亂度陂煙簑橫背臥風笛隔林吹
孳息欣咸若甄陶曠莫涯融融和
氣洽藹藹物情怡漢喘休勞問商歌漫自悲
戴嵩能貌古班特浪傳疑展卷懷周澤涵濡宛在茲

書百牛圖後

明丘濬

我本農家子兒時曾作牧
倒騎牛背上蓑笠吹橫竹
老

大客京國久不見此畜忽然覩斯圖心若有所觸泛觀
天下物無物似牛犢既以拽犁耙又用轉車轂爲我運
百貨爲我生百穀論功亦莫比論苦亦良酷云胡世上
人甘心肆口腹既然食其力何忍食其肉水陸珍百品
物物可充欲孟子有遺言不忍其觫觫

蜀女繡牛圖

元
袁
桷

絕壁連雲翠木稠五丁空作蜀王羞浣花女子聞鵲苦
繡作春風萬古愁

題錦屏史仙繡牛圖

三首

元 吳澄

平原君像何人繡費幾千絲似髮稠可是史仙能狡獪
聚毛繡出下邳侯

有毛無革毛安傳傳上田單奮彩繒陸放水浮俱幻影
底須拽鼻著長繩

爲汝前身膽氣麤却將假合化真如雖然毛色皆如舊
悅草觸人心已無

題四羊圖

宋 王阮

三百維羣世不見迺以四羊爲一圖人言此圖出韋偃
不知韋偃有意無巖巖參天一古木下有輕蕙滿郊綠
雪髯隱約黑暈中沙肋微茫筆端足昔聞韋侯畫馬工
杜陵長歌歌古松孰知畫羊更如此世間絕藝誰能窮
蘄春太守好事者珍藏有此希世畫嗟予得見雙眼明
此一轉語久難下三羊游戲芳草茵一羊輒登枯樹根
安得添我作牧人爲公鞭此一敗羣

恭題靈羊圖

有序

明
謝承舉

宣宗御筆也羊圖三頭坡下一犬有欲搏之狀而羊
意馴擾感賦長句

塞上春深草初綠黃河套邊堪放牧何來羌羴攜乳畜
旁有韓盧將搏逐羴羴不奔且不驚輜車無影鸞無聲
持旄已歸蘇子卿挾冊未見黃初平羊何安閑盧何猛
以靜制動清邊境我皇執筆發深微意在雍和化強梗
是時賢相惟三楊昇平輔理稱虞唐九重優游翰墨場
天與人文垂四方

趙王孫墨羊圖

明
偶桓

王孫長憶使烏桓因念蘇卿牧雪寒落盡節旄無復見
寫生傳得兩牋看

黃荃芙蓉乳狗

元
虞集

西旅初聞效貢來金毛覆地不凡材騶虞麟趾同靈囿
抱子花陰臥石苔

海狗窠石圖

元
袁桷

靈壁層峰負六鼇藥欄花檻翠周遭如何畫史同羣吠

不與君王繪旅獒

題窠石海狗圖

元柳貫

越犬初隨賈舶來，閑階弄影小徘徊。
花陰滿地濃如雪，解下金鈴不用猜。

題犬

元貢性之

深宮飽食恣獐獐，臥毯眠氈慣不驚。
却被卷簾人放出，宜男花下吠新晴。

題犬

明張鳳翼

玉勒追隨子夜風金鈴搖月吠梧桐明朝較獵長楊館
萬騎叢中第一功

題李迪畫犬

明高啓

護兒偏吠客花下臥晴莎莫出東原獵春來兔乳多

趙南伸寄王樸畫猫犬戲爲之賦

宋樓鑰

鬚鬚兩狡獬胡爲到庭戶細觀畫手妙摹寫真態度意
足謝繁華不待丹青汙亂埽腹背毛頭足巧分布尤也
如愁胡眉攢眼光注豈惟足生髯垂耳紛敗絮掉尾固

自若狸奴爲驚懼側耳實畏之衝目猶敢怒誠知取形
似不吠亦不哺對之輒一笑聊用慰沈痼

狸奴畫軸

金王良臣

三生白老與烏圓又現吳生小筆前乞與黃家攘鼠禍
莫教虛費買魚錢

醉貓圖

何尊師畫宣和
內府物二首

元元好問

窟邊癡坐費工夫側輓橫眠却自如料得仙師曾細看
牡丹花下日斜初

飲罷雞蘇樂有餘
花陰真是小華胥
但教殺鼠如丘了
四脚撩天一任渠

題武仲經知事獅猫畫卷

元程鉅夫

金絲色軟坐常溫
飽食深宮錦作墩
若使爰書無法吏
詩人應歎鼠翻盆

何尊師醉猫

元袁桷

攪甕翻盆勢不禁
晚風辭醉首岑岑
醒來獨立闌干畔
四壁無聲蟋蟀吟

王振鵬狸奴

元
袁
桷

畫堂綠幕鎮犀懸
花影雲陰得散眠
自是主家局鎖密
晚風緣木捕新蟬

題睡猫圖

元
柳
貫

花陰閑臥小於菟
堂上氍毹錦繡鋪
放下珠簾春不管
隔籠鸚鵡喚狸奴

題猫

元
丁
鶴
年

食有溪魚臥有裯
主恩深重更無倫
若將乳鼠誇爲瑞

恐負隆冬蜡祭人

芙蓉白猫手卷

元 錢惟善

秋花石上玉狻猊
金尾脩脩斂四蹄
零落舊時宮女扇
撲螢曾見畫闌西

題宋徽宗畫狸奴銜魚圖

元 錢惟善

徽廟宸翰世已無
銜魚隨意寫狸奴
鸞輿北狩知何處
惆悵春風看畫圖

題畫猫

明 劉基

碧眼烏圓食有魚
仰看胡蝶坐階除
春風漾漾吹花影
一任東郊鼠化鴛

題茅山道士藏徽宗畫猫食魚圖

明解

縉

仙籙從教滿石牀
花陰睡覺赴雲鄉
即今鼠輩都消盡
飽食溪魚化日長

豕圖行

元戴良

胡風吹沙黃入天
胡馬奔騰西出關
邊頭人民格鬪死
路旁突出惟孤豕
羣胡走馬逐豕逃
彎弓奮戟意氣豪

一人自足當豕力萬騎盤旋追不得當時豈爲一豕謀
只恐功成恩寵休豈知此豕命旣脫薦食郊原竟難遏
秋來草黃馬正肥將軍處處事驅馳何時射豕得豕歸
嗚呼何時射豕得豕歸

御定歷代題畫詩類卷一百七

欽定四庫全書薈要

御定歷代題畫詩類卷一百八目錄

鱗介類

題張道隱太山祠畫龍

唐蔣貽恭

題畫龍

宋樓鑰

毘陵天慶寺觀畫龍

宋戴復古

畫龍

宋劉叔巖

段志堅畫龍

元元好問

題家龍溪畫龍

元李祁

題陳所翁畫龍

元李祁

題金汝霖畫龍

元李祁

畫龍歌

元碩裕實哈雅

題所翁畫龍

元張渥

陳所翁子雷巖畫龍

元劉詵

題劉彥達龍幃

明解縉

畫龍歌

明周是修

題張秋蟾畫龍 明袁忠徹

畫龍 明丘濬

題畫龍 明劉溥

題龍 明林景清

題龍 明周述

題王宰所藏墨龍 元柳貫

題陳所翁墨龍 元薩都拉

墨龍 元張雨

謝徽上人見惠二龍障子以短歌酬之 唐齊己

上清盧道士所藏雙龍圖 元成廷珪

雙龍圖 元張憲

題雲龍 元袁桷

題雲龍 明杜嗣昌

題蒼龍戲海圖 元陳泰

郭恕先升龍圖 元鄧文原二首

題太玄天師畫升龍圖 元柳貫

題廣微天師昇龍圖 元錢惟善

題曜海朝天龍圖 元歐陽玄

僧傳古踴霧出波龍圖歌 元柳貫

雲龍教子圖 元卞思義

老龍引子歸潮圖 明曾烜

題羣龍圖 明劉基

六龍圖 明丘濬

題九龍圖 元劉韶

題陳所翁九龍戲珠圖

元張翥

榮碧潭全身龍

元歐陽玄

所性姪藏所翁金身戲珠龍

元歐陽玄

玉龍圖

元虞集

題陳所翁畫墨色臥龍

元馬臻二首

臥龍圖

元許有壬

豢龍圖

宋魏了翁

贈玉龍曾道士畫龍頭

元僧圓至

擬題素菴龍頭

明葉盛

題鳥王啖龍圖

明王世貞

題春雷出蟄圖

明王世貞

題毛維勤所藏禹門三躍圖

明顧清

欽定四庫全書

卷一百八目錄

欽定四庫全書薈要卷一萬九千二百十六

集部

御定歷代題畫詩類卷一百八

鱗介類

題張道隱太山祠畫龍

唐

蔣貽恭

世人空解競丹青
惟子通玄得墨靈
應有鬼神看下筆
豈無風雨助成形
威疑噴浪歸滄海
勢欲擎雲上杳冥
靜閉綠堂深夜後
曉來簾幕似聞腥

題畫龍

宋

樓鑰

老龍臥海沙覺來未欠伸珠光發海底闐然自有神畫
龍不畫全必雜煙雨雲此龍未嘗動具見爪與鱗一龍
望見之爭心生怒嗔奮迅勇欲前便爾雲滿身不知出
誰筆定非塵中人若非親見之何由寫其真雲濤方洶
湧恍若渺無津爲霖會有時正爾良苦心乃知青雲高
不如寂寞濱深處或飛去什襲聊自珍

毘陵天慶寺觀畫龍

自題姑蘇羽士李懷仁醉
筆詩呈王君保寺丞使君

宋

戴復古

姑蘇道士天酒星醉筆寫出雙龍形墨蹟縱橫奪造化
蜿蜒滿壁令人驚一龍翻身出雲表口吞八極滄溟小
手弄寶珠珠欲飛握入掌中拳五爪一龍排山山爲開
頭角與石爭崔嵬波濤怒起接雲氣不向九霄行雨來
萬物焦枯天作旱兩雄壁隱寧非懶真龍不用只畫圖
猛拍欄干寄三歎

畫龍

宋
劉叔巖

南人謁雨爭圖龍畫師放筆爲老雄煙雲滿壁奪畫色

雷電應手生狂風觀者皆驚爪牙動攫拏意似翻長空
吾疑奮迅出戶牖何事經時留此中共言葉公初好畫
當時亦有神龍下天意爲霖非爾能世俗慕真聊事假

段志堅畫龍

爲劉鄩
州賦

元
元好問

豬龍可豢亦可屠世人畫蛇復畫魚天飛忽入阿堅筆
始覺衆史欺庸愚腥風萬里來白浪橫江湖一麾走海
若再顧失天吳浩蕩明河翻尾鬣慘不濡只愁紙上出
雷火搏控大千如此珠天生神物與化俱滅沒變見何

所無逆鱗自古不受觸乃今縮頭隨卷舒怪得堂堂髯
御史平生長有雨隨車

題家龍溪畫龍

元李祁

龍溪溪上見蒼龍勢在飛騰變化中沛作甘霖能濟旱
九州四海樂年豐

題陳所翁畫龍

元李祁

千年老龍伏巖阻懶向天台作霖雨忽逢健筆一寫之
鬣角鱗鬚盡蒼古溪風肅肅山雨寒驕螭騰拏穉蛟舞

願君長留此畫江海間更使千年作龍祖

題金汝霖畫龍

元李祁

大海波濤起高堂雲霧興九州望霖雨須汝一飛騰

畫龍歌

元碩裕實哈雅

老墨糊天霹靂死手擘明珠換眸子一潛淵澤久不躍
泥活風鬚色深紫虬髯老子家燕城怒吹九龍無餘燈
手提百尺陰山冰連雲塗作蒼龍形槎牙爪角隨風生
逆鱗射月干戈聲人間仰視翫且聽參辰散落天人驚

瀟湘浮黛蛾眉輕太行不讓蓬萊青烈風倒雪銀河傾
珊瑚蓋闊堪不平吸來噴出東風迎春色萬國生龍庭
七年早絕堯生靈九年滯漲舜不耕爾來化作爲霖福
爲吾大元山海足

題所翁畫龍

元張渥

我聞真龍神變化呼吸風雲齊上下胡爲却向九淵潛
頷下驪珠光不夜一朝帝敕鞭雷霆祕怪恍惚無逃形
蜿蜒千丈露頭角顛倒山嶽翻滄溟乾坤瀕洞日爲黑

元氣淋漓收不得願將點滴試天瓢草木晴光甦下國
龍兮龍兮汝爲龍攀之不見追無踪何當飛空附其尾
手按鴻濛究元始

陳所翁子雷巖畫龍

元
劉詵

所翁畫龍妙天下墨水千江醉傾瀉天地變色草木寒
霆電交作畫爲夜陰風蕭蕭出空庭天落黃金辟間挂
前身是龍身不知龍來與語相娛嬉歲饑垂龍不肯起
畫龍夜出行雨歸不知雨到幾千里但見絹素濡淋漓

所翁丹成駕龍去雷巖傳家有奇趣蜿蜒半幅浩欲動
鱗鬣搓牙攫雲霧軒窗怒濤聲洶歔篋笥夜光亞春吐
嗟哉雷巖今亦仙此龍神妙不再覩誰能久藏繫金柅
雷公繞柱窺囊楮只今春風急雨日夜多便恐一日飛
去驤天河

題劉彥達龍幃

明解縉

道人飛入水晶宮手挽天河畫玉龍一夜風雷繞南國
海門桃浪漲春紅

畫龍歌

明周是修

雲如車輪風如馬雷鼓砰訇電旗捲其中踊躍何爾爲
無乃蜿蜒作霖者古來善畫此者誰葉翁所翁稱最奇
筆端揮灑絕相似亦有風雲雷電隨大梁徐公生卓犖
自少以來深好學揮毫灑墨運天機鬼泣神愁日光薄
斯須縞素騰真龍莽蒼直奪造化工恍如列缺引霹靂
歛若巽二驅豐隆枯木搓牙頭角露鱗拂雪花駭成怒
劃然威掣海門開勁望層空欲飛去我時見畫心膽豪

拔劍起舞翻絨袍波濤萬頃東溟闊瘴煙千丈南衡高
嗟哉徐公天相爾後恐無繼前無比酒酣神氣益灑然
白日風雲牕戶起爲君一作畫龍歌雷風激烈雲嵯峨
魚鰕混處不可久龍兮龍兮奈爾何

題張秋蟾畫龍

明
袁忠徹

張公畫龍人不識筆法遠自僧繇得挂向高堂神鬼驚
恍忽電光飛霹靂想當渤澥開筆力元氣霖霖浸無極
吐吞霧雨川澤昏摩蕩雲雷太陰黑江翻石轉窈莫測

雪濤卷空銅柱仄洞庭扶桑非爾誰顛倒滄溟爲窟宅
乃知茲圖只數尺坐令萬里起古色何當置我君山湖
上之高峰聽此老翁吹鐵笛

畫龍

明丘濬

黑風吹白雨海立水翻波老龍空作勢不救旱田禾

題畫龍

明劉溥

古來畫龍稱葉公後來又說陳所翁嗚呼二人不可見
神妙誰復追其踪此圖知是何人作一見令人即驚愕

勢翻滄海起風雷
身湧長空奮頭角
雙睛潑電鱗鬣分
左盤右蹴挈飛雲
軒然天地動光彩
此時不顧魚鰕羣
滿堂慘淡凝煙霧
相對咨嗟毛髮豎
田疇歲旱望甘霖
破壁須看上天去

題龍

明
林景清

春雷一夜天池震
七澤濛濛煙雨暝
數聲驚起臥潭龍
怒捲銀濤飛萬仞
黑雲影裏露奇形
鱗甲錯落光縱橫
鬚鬣奮張聳頭角
炯炯射海雙瞳明
伊誰老手妙無敵

奪得天機歸筆力所翁之後豈無傳只恐驚愁山鬼泣
龍兮龍兮真有神須臾變化隨屈伸何當吸盡滄海水
徧澤枯槁皆回春

題龍

明周述

虬龍靈變不可測蜿蜒歲久蟠滄溟碧波怒捲若山立
朱橋似欲凌空行是誰寫此得真趣白晝高堂起煙霧
慎莫雙眸更點睛只恐乘雲天上去

題王宰所藏墨龍

元柳貫

飛廉爲御豐隆車憑陵九淵傾尾閭誰與發墨啓玄奧
神光躡斗旋其樞湖邊竹屋清夜徂防有没人來摘珠

題陳所翁墨龍

元
薩都拉

畫龍天下稱所翁禿筆光射驪珠宮長廊白日走雲氣
大廈六月生寒風興來一飲酒一石手提元兔槌霹靂
漲天煙霧晴不收頭角崢嶸出牆壁全形具體得者稀
今日海邊親見之滿堂光焰動鱗甲倒挾海水空中飛
凌風直上九天去天下蒼生望霖雨太平天子居九重

黍稷穰穰千萬古

墨龍

元張雨

高昌世子寫墨龍此龍乃出開元東井中東井水與天河通龍下取水遺其踪道人識為黑帝子逃入世子之筆鋒井頭夜半飛霹靂元氣淋漓雪色碧一鎖銀牀五百年纔點目睛生羽翼

謝徽上人見惠二龍障子以短歌酬之

唐齊己

我見蘇州崑山佛殿中金城柱上有二龍老僧相傳道
是僧繇手尋常入海共龍鬪又聞蜀國玉局觀有孫遇
跡盤屈身長八十尺遊人爭看不敢近頭覩寒泉萬丈
碧近有五羊徽上人閑工小筆得意新畫龍不誇頭角
及鬚鱗只求筋骨與精神徽上人真藝者惠我雙龍不
言價等閑不敢將懸掛恐似葉公好假龍及見真龍却
驚怕

上清盧道士所藏雙龍圖

元
成廷珪

仙潭煙霧曉冥冥彷彿飛空劍氣腥巖穴幾年當蛻骨
畫圖今日露真形天瓢水淺陰猶伏寶藏雲深夜不扃
好就盧敖聽驅使八方行雨鼓風霆

雙龍圖

元張憲

雲谷道人手持一片東溪鱸雲林散人爲作雙龍出入
清潮圖硯池濃磨五斗墨手塗脚蹋頃刻雲模糊既不
爲爬山引九子亦不作掣電吞雙珠但見一龍盤空偃
蹇飛下尾間穴一龍攪海奮迅直上青天衢雄者筋脉

緊雌者腹肚麤雙衝交挺白玉柱兩角對樹青銅株宛
宛脩尾卷蹴浪花白鼎鼎鉅甲挾拍相風鳥性馴肯入
孔甲駕氣惡欲踢豐隆車張吻啖阿香舞爪拏天吳轟
霆時或取旱魃飛雨自足蘇焦枯寸池尺沼雖云不能
一日處十年未用猶可高臥南陽廬雲谷子七寶鉢盂
深袖手雲林子光環金錫且載酒吾將倒三江傾五湖
洗餘百戰玄黃血盡率凡鱗朝帝都

題雲龍

元
袁
桷

玉淵發靈籟摩盪起九天調鉛靜召之帖首在我前

題雲龍

明杜嗣昌

天矯騰空勢欲盤墨雲漲壁畫漫漫生平學得屠龍技
把劍偏從畫裏看

題蒼龍戲海圖

元陳泰

天孫織雲春錦紅玉梭悞落乘剛風一夕變化雲冥濛
海水起立爲珠宮坐令年年機杼空誰與黼黻上帝躬
求梭不得愁鬼工安知入君懷袖中

郭恕先升龍圖

二首

元 鄧文原

海上參差十二樓，閨風玄圃綵雲浮。
神仙尚厭人間世，故作乘龍汗漫遊。

建章宮闕漏沈沈，翠輦春遊接上林。
未識嫦娥天上樂，廣寒丹樹五雲深。

題太玄天師畫升龍圖

元 柳貫

博太真人衡氣機，硯池傾倒墨龍飛。
風風雨雨成功後，却蛻升形上袞衣。

題廣微天師昇龍圖

元 錢惟善

噓氣乘雲薄太清
墨卿靈怪硯池腥
波濤光彩失雙劍
風雨晦冥驅六丁
朱火騰空超碧落
翠鱗垂水捲滄溟
真人上挾飛仙去
安得攀髯過洞庭

題曜海朝天龍圖

元 歐陽玄

玄雲靈對海波立
神龍挺水超天潢
畫師題筆睨八極
意與元氣爭毫芒
玉京仙聖驂翱翔
雜騎麒麟與鳳凰
龍拖雲氣歸洞府
海日杲杲天中央

僧傳古踴霧出波龍圖歌

元柳貫

葉公好龍致真龍精氣所感無不通僧中劉累有傳古
夜夢捷入驪龍宮陽暉焰焰陰魄動左右給侍皆魚蟲
探珠不得逢彼怒轟然鼓鬣興雷風潛窺竊識領其妙
寫之萬楮將無同日睛數月纔一點波浪只尺如層空
乘雲執鏡麾電母跨海獻寶招河宗劉嘗善泰古善畫
得意忘象象乃工爲龍爲畫了不識有頃噴水投長虹
龍乎龍乎德正中超忽變化天爲功絳宮帝子秉節從

九淵喚起赤鯁公永奠鰲極開鴻濛

雲龍教子圖

元卞思義

龍公頭角何嶄然教子拏雲飛上天語之慎勿習癡懶
旱水盤盤井底眠

老龍引子歸潮圖

明曾烜

海門秋氣橫江來怒濤殷地如奔雷蒼龍教子習潮勢
排風噴雪煙雲開憶昔深潭事冲舉直上穹霄輕一羽
曾噓數滴翻瓢漿散作九州三日雨只今回顧忍潛蹤

引子不敢施神通却愁幼小易飄忽一瞬萬里天無工
我聞靈物多奇異潛飛大小皆隨意畫師恐是張僧繇
寫向生綃若真致龍今育子猶世人古來有欲皆可馴
何當重起秦龍氏愛養留作商巖臣

題羣龍圖

明
劉基

世間萬類皆可覩茫昧獨有鬼與龍此圖畫龍二十四
狀貌詭譎各不同得非物產有異種或曰神變無常蹤
一龍捷尾欲上水足爪猶在齋泮中一龍出穴飲澗底

頭上飛瀑瀉白虹前有一龍已在雲顧視厥子揚雙瞳
浪波魚鱗沓硿礧日車塊北天無風中庭兩龍忽相逢
須眉葩髣如老翁便欲角觝爭雌雄西望積石接崆峒
白龍擘石窺流潦河伯遠遁虛其宮屈蟠睡者何龍鍾
老物用亢時當終峽外六龍寧以兇矜牙舞爪起戰攻
齧鱗嚼甲含劒鋒陷胃折尾波血紅之死弗悟人誰恫
一龍引吭將欲從迴環睢盱未敢通最後一龍藏於壑
睥睨勝敗非愚种無乃有意收全功雲中弄珠勞爾躬

不如臥沙之從容龍子學飛力未充母在下視心憧憧
何物一角額準隆鰓然出洞若蛇蟲有龍接之自龍從
恐是鰲穴王鮪公皮骨始脫形猶蒙兩龍歸來倦不矜
癡龍攀石身已癢蚰蚪偃蹇歛騰衝蜿蟺攫躍鬚髮茸
呿呀奔拏曲如弓百態並作何紛龐是耶非耶孰能窮
畫師昔有僧繚工能令真龍下虛空安得伶倫截竹筒
吹之呼龍出石罅使我一見豁昏瞢

六龍圖

明丘濬

顥蒼生萬類行天莫如龍純秉至陽精卓爲鬼物雄大
小靡定形去住無常蹤一之已難見況乃六者交騰衝
一龍昂首揚其鬚奮起直上拏虛空一龍捷尾出齋汙
迴身轉脊如宛虹其餘兩兩峙相向戲弄明月雲濤中
矜牙露其爪氣勢何獍兇是時元氣濕濛濛河海起立
地天通鬼神盡泣真宰怒呵叱屏翳驅豐隆嗚呼神物
變化不可窮胡爲羣聚如昆蟲無乃畫工巧爲此潛以
翰墨偷天功君不見古來好者有葉公真龍聞之降其

宮又不見近來畫者有洞微真龍現相來相從君從何
處得此本彷彿似是原本闕三字精誠感通理或有慎勿輕易
爲點瞳會須一夜原本闕二字去轟雷鼓驚天風流下土霑耕
農

題九龍圖

元 郊 韶

九龍起幽壑百谷走春雷峽拆蒼厓斷天傾白浪迴朝
行神禹穴莫過楚王臺應有天瓢手爲霖遍九埃

題陳所翁九龍戲珠圖

元 張 翥

兩龍頡頏出重淵白日移海空中懸一龍回矯一倒起
側磔胡髯怒飲水大珠炎炎如彈丸爪底雲頭爭控搏
一龍仰首逆鱗露兩龍旁睨蒼崖蟠怪風狂電浩呼洶
天吳崢嶸立八山動一龍後出尤崛奇半尾戲繞蜿蜒兒
兒生未角已神猛一顧却走千蛟螭陳翁硯池藏霹靂
徃徃醉時翻水滴便覺天瓢入手來雨氣模糊渾是墨
我嘗見畫多巨幅皴蕩驚濤駭人目何如此筆窮變化
三尺微綃形勢足是翁前身定龍精故能吸歛奔精靈

卷圖還君慎封鎖但恐破壁飛空冥

榮碧潭全身龍

元
歐陽玄

巨壑深溪萬水深四時濃黛浸千峰天衢邂逅全身露
還信碧潭盤老龍

所性姪藏所翁金身戲珠龍

元
歐陽玄

萬戶千門夜半雷明朝日出五雲堆老龍引領春消息
翫弄明珠未肯來

玉龍圖

元
虞集

貝闕澄澄海月生
水晶簾影接空明
鮫綃翦得霓裳就
却擁冰髻上太清

題陳所翁畫墨色臥龍

二首

元馬臻

集霧流雲意匠勞
天風鱗甲動霜毫
莫教流落人間世
怕有當年葉子高

曾出秦山飲渭川
怒風翻浪自高眠
如今四海均霖雨
不用拏雲上九天

臥龍圖

元許有壬

能辨人間大有年九淵誰遣抱珠眠等閑莫似隆中起
雨得西南最爾天

蔡龍圖

宋魏了翁

乾坤包萬有納納百囊畧人位乎兩間利與害爲禦一
氣貫四時五風甘十雨神龍以爲畜擾御不予侮河有
背負圖庭無滌流女義理之不明人情自疑沮範圍吾
職分徃徃若違拒同室操戈鋌一身隔肺腑帝王蔡龍
意棄置那復取四靈非不靈有不得其所生息之相吹

古今類如許古人體天意萬物我其主蟲莫知於龍拊
循如士伍今何故無人亦足驗胷府聲和鳳來儀心平
轡如組矧伊人中瑞治亂係嘿語欲入而閉門誰出不
由戶茲事關人心作詩附農圃

贈玉龍曾道士畫龍頭

元僧圓至

垂龍逃雨走急落西山陬縮入畫仙筆雷公不能搜畫
仙有墨池尺水涵十洲俗龍作玄骨騎入塵寰遊我求
寫龍真畫仙許我不形全恐飛去爲君且畫頭

擬題素菴龍頭

明葉盛

殿前同日奉絲綸屈指今過二十春
一管宣毫還好在龍頭不畫畫麒麟

題烏王啖龍圖

明王世貞

黑風吹海海水立琉璃宮中老龍泣此時鼓翼天關摧
左足下蹴龍宮開海人明珠若明月願贖龍軀了無咎
鼉叅鼉史祈以身天廚朝舖不爾珍老拳頓顙隆準圻
雙角拉枯血中擘敗鱗飛空空欲赤餘噫尚足呼風霆

擲火波底流金鈴宛轉骨盡神不靈我聞閻浮提三千
六百海一龍一餐八萬載須彌山傾劫福竭鳥王與龍
竟誰在君不見龍兒一夢何其聰可憐宮中羣小龍金
翅乃是宣城公

題春雷出蟄圖

明 王世貞

一夜春雷發羣蟄自相語神龍豈不勞人間要霖雨


題毛維勤所藏禹門三躍圖

明 顧清

一夕風雷動九重春江回首萬鰓鱗雲泥只尺從人辨

諸葛南陽本是龍

御定歷代題畫詩類卷一百八



總校官庶吉士臣侍朝

校對官庶吉士臣徐如澍

謄錄監生臣張虎文

欽定四庫全書薈要

集部

御定歷代題畫詩類卷一百十九

欽定四庫全書薈要

御定歷代題畫詩類卷一百九目錄

鱗介類

仲咸借予海魚圖觀罷有詩因和
宋王禹偁

贈徐子虛畫魚
宋王佐才

題趙晞遠魚
宋樓鑰

醉題魚屏
宋樓鑰

羅浮何君祐夫相訪惠詩又出所作水墨魚戲題



卷末

宋李昉英

子用惠畫魚四軸以詩謝之
宋王炎

贈畫魚者
宋白玉蟾

贈周東卿畫魚
宋文天祥

題東海徐白魚
元王惲

畫魚
元成廷珪

題畫魚
明劉基二首

題程亞卿所藏劉進畫魚
明李東陽

彭學士先生所藏劉進畫魚

明李東陽

畫魚

明周用

畫魚

明錢宰

贈泰塘畫魚程翁希明

明程敏政二首

和趙類菴題畫魚

明陸深

畫魚

明徐渭二首

百魚圖

元吳師道

游魚圖

元鄭元祐

徐白秋塘戲魚圖

元袁桷

題子行所藏魚藻圖

元楊載

題落花游魚

元陶宗儀

大魚圖

明劉珙

題魚荷卷

明林環

閣學袁侍郎燮以朝鯉泰龍兩圖見寄索和朝鯉

宋魏了翁

題畫鯉魚

宋王庭珪

題赤鯉圖

元李祁

爲王侍郎題鯉魚圖

明丘濬

畫躍鯉送人

明徐渭

鰕魚圖

明李東陽

趙子昂鰕圖

明何瑋

題一鯖百鰕圖

明范嵩

題柯行所藏秋水纖鱗圖

明顧璘

海鰕圖

明王鏊

畫鰕 明周用

題畫鰕 明程敏政

依韻和原甫廳壁錢諫議畫鰕 宋梅堯臣

宋徽宗畫鰕 元馬祖常

題鰕 元陳高

題鰕 明劉基二首

畫鰕 明錢宰

題鰕 明王世貞

題畫蟹 明徐渭

魚鰕螺蟹 明徐渭

蓮龜 宋蘇軾

黃荃龜藏六圖 元元好問

龜蓮圖 元劉因

靈龜篇題馬尊師所畫芝龜 元楊載

題蚌蛤圖 明吳寬

欽定四庫全書薈要卷一萬九千二百十七

集部

御定歷代題畫詩類卷一百九

鱗介類

仲咸借予海魚圖觀罷有詩因和

宋

王禹偁

偶費霜縑與綵毫海魚圖畫滿波濤
搯床難死慙龜殼把酒狂歌憶蟹螯
鮑鮓脚多垂似帶鋸鯊齒密利如刀
何當一一窮真偽須把十尋鐵網撈

贈徐子虛畫魚

宋 王佐才

我嘗放意遊江湖喜從釣叟觀真魚有時臨溪行復坐
秋水無風魚自如鮮鱗滑鬣隨上下回旋戲躍形皆殊
兩兩相逢若對語聚頭戢戢搖雙鬚忽然散漫背遊去
一半掉尾潛菰蒲往來得所弄晴色圓波觸動生浮珠
困依垂楊看不足盡日忘歸誰與俱自從北走塵土窟
十年不復瞻尊鱸憑誰畫出江湖趣東海今聞徐子虛
毫端奪得生時意京師好事爭傳摹寫成雙幅輒遺我

展舒活動驚堂隅窮搜前古少奇筆此本只恐人間無
任教洄轍強濡沫對面相忘千里書

題趙晞遠魚

宋樓鑰

藻翻數尾已如生妙絕魚兒作隊行不是深知濠上趣
未應筆底得縱橫

醉題魚屏

宋樓鑰

五千買得見屏風白魚相逐菰蒲中俊尾潑刺有生意
旁人未易分雌雄屏後諸孫更雍容戢戢無數迷西東

我雖非魚知魚樂樂處未必魚知農

羅浮何君祐夫相訪惠詩又出所作水墨魚戲題

卷末

宋
李昂英

山頭釣引千鈞魚鐵橋曾逢稚川奴風波平地誤點額
戲取墨汁翻模糊縱觀濠上契妙趣浩浩冒次涵江湖
墨雲忽從硯池起潑刺跳出形模殊大魚騰蹙撼風雨
小魚瑣碎游荇蒲技如元放幾許奇金盤一箇松江鱸
試張亭前漲波影春鋤飛下傍睢盱世間畫史少活筆

描寫終類鮒肆枯文溪一灣浮釣徒欠得龍眠爲嚴瀨
羊裘圖

子用惠畫魚四軸以詩謝之

宋王炎

四幅溪藤任卷舒管城幻出化龍魚風雷定似拔飛走
莫悞呼兒覓素書

贈畫魚者

宋白玉蟾

昔日僧繇所畫魚三十六鱗依翠蒲徐高畫中多畫魚
鼓鱗揚鬣今爲圖古人妙畫猶不朽今人妙處古未有

郭丹青者冠古今天下畫魚第一手畫到妙處手應心
心匠巧甚機智深紙上溶溶一溪水放出鯨鱣二三尾
金鱗錦鬣紅玉髻圍圍洋洋戲波裏小魚如針同隊行
噉嚼水面隨風萍擲頭掉尾浮沉勢三聚二散游躍意
筆分濃淡計萬鱗劃鬚點眼勻墨痕狀如拋尺量波練
復似穿梭擲水紋宛然鱗鱗巢青藻漁翁未釣先吹火
壁上魚躍水不流稚子睥睨敲針鉤君今畫到入神處
此畫一出聲尤著魚雖無腸有活意玉波浸汀澄寒渚

深恐後夜或雷雨化作龍飛禹門去

贈周東卿畫魚

宋 文天祥

觀君瀟湘圖起我濠上心短褐波濤舊秋雨菰蒲深

題東海徐白魚

元 王惲

點額雷燒不到渠相忘何必在江湖細吹藻行充飢了
兩領腥涎儘自濡

畫魚

元 成廷珪

生平蹤迹侶魚鰕浦月山風滿客槎曾向春盤登北鮓

更從丙穴薦南嘉
賞花釣得留詩友
折柳穿來覓酒家
萬里江湖清夢遠
於今空對畫中誇

題畫魚

二首

明
劉基

爲愛濠梁樂有餘
故拈兔穎寫成圖
秋風忽憶銀絲鱸
腸斷松江隔具區

九罟無人詠鱗魴
河墳有客歎牂羊
不知生意能多少
爭得鯢鮪滿尺長

題程亞卿所藏劉進畫魚

明
李東陽

劉生亦是丹青豪近來作畫無此曹平明退直呼濁醪
半酣脫却宮錦袍戲將秃筆作鱗介已覺四壁生風濤
風濤洶湧向何處岸闊江空起煙霧東風一夜吹水渾
翠鬣紅鬐不知數桃花柳絮時吐吞輕繁亂行交繽紛
圓光倒射日成凸滅影下沒天無痕羣嬉若共衆芳狎
遠樹忽與洪波奔千形萬態極幻化倉卒逢之安可論
就中鉅者稱赤鯢卓犖頗似鯨與鯢仰窺河漢若咫尺
俯視江海如罌盆巖壑變風雨作走天吳驅海若流雲

掣電同揮霍噴沫浮漚滿寥廓鋒鏑參差見齟齬劒戟
崢嶸露頭角直遣飛騰動鬼神寧誇震撼傾山嶽若非
溟渤即洞庭不然豈得通幽靈幽靈汗漫入恍惚始信
丹青有奇骨劉生劉生良已工誰其愛者司徒公華堂
錦軸粲盈丈髣髴坐我龍門中龍門高高幾許葉公畫
龍龍出走此物胡爲在庭宇知公自是人中龍會向人
間作霖雨玉如意金叵羅激高堂揚練波文王在沼民
共樂君子有酒吾當歌我生解詩不解畫潦倒不覺雙

顏酡吁嗟乎吾當奈爾丹青何

彭學士先生所藏劉進畫魚

明 李東陽

魚爲水族類最稠近時畫手安城劉生綃如雲筆如雨
恍惚變態不可求大者獨立爲豪酋小者列從分奴騶
翻身煦沫日弄影一一如在空中遊風髻霧鬣卷復舒
頃刻巨浪高山丘上摩虛無拂倒景下逐遠勢歸長流
初疑聚石作九島咫尺之地皆汀洲又如然犀照牛渚
海若露叫羣靈愁問渠類象誰指示或者神授非人謀

畫圖貴似不必似却恐有意傷雕鏤擬將天地作畫筭
此語吾傳蘇子由江湖茫茫隔塵土吾欲遠挂珊瑚鈎
臨淵之美亦徒爾況乃物幻無停眸詩成日暮酒半醒
蕭蕭落木高堂秋

畫魚

明周用

黃河萬里奔海東怒觸底柱生雷風憑陵祇欲騰虛空
云是西河赤鯁公一魚人立二魚從前者潑刺後喁喁
滄江夜月貫白虹憑君卷去還吳淞作詩敢與誰爭雄

中有雲氣隨飛龍

畫魚

明錢宰

綠波春水沒漁家
楊柳青青拂釣槎
三月江南春雨歇
一雙鱸鮓上桃花

贈泰塘畫魚程翁希明

二首

明程敏政

疊嶂如城水滿川
門前喬木翠參天
路人來往能相指
文獻傳家幾百年

愛魚何羨古濠梁
畫出羣魚趣更長
正欲垂綸尋釣隱

何時相約水雲鄉

和趙類菴題畫魚

明陸深

天池咫尺候龍飛行帶荷錢出水肥神物自應多變化
長竿空傍釣魚磯

畫魚

既作古詩後
得七律二首

明徐渭

勺水寸魚何褊褊斗方小亦放生池
豆人寸馬非吾事
雪白蕉紅任爾疑連歲波臣多死旱
此中釣叟底垂絲
點睛翻笑僧繇手飛向雲霄何所爲

茲圖稍似少陵詩微風吹雨出魚兒尺梢詎許牛涔活
遠水何勞象隊移是處有魚爭聚網畫心無懶穩搖鬚
五侯刀几知多少免爾爲鯖正在斯

百魚圖

元
吳師道

小魚戢戢同隊嬉羣魚出沒相追隨
鱣公掉尾殿其後氣參變化非凡姿
水深蒲藻相因依嗟魚之樂魚自知
畫師點綴百態具問爾當日何由窺
大眾密網紛如織鬻市何曾持盈尺
有生嘗抱竭澤憂相戒徒聞過河泣

江湖新水春拍天安得魚我俱悠然聞道君王闢靈沼
願繼周頌多魚篇

遊魚圖

元 鄭元祐

潑刺春波藻荇深方池容得五湖心硯坳更有神龍在
難起商巖旱歲霖

徐白秋塘戲魚圖

元 袁 楠

魚背水深一尺溪毛日映千絲似笑釣鰲狂客獨騎瘦
馬歸遲

題子行所藏魚藻圖

元楊載

畫出鯨魚戲綠漪，羣分白小更相隨。
主人真得蒙莊趣，視此洋洋樂可知。

題落花游魚

元陶宗儀

蒲抽翡翠茸，茸花落胭脂。
片片曉來戲，啖游魚雨霽綠波如練。

大魚圖

明劉珏

長風捲海崢嶸立，百川如沸天吳泣。
赤鯉橫霜怒浪掀，

三十六鱗當水擊揚鬐鼓鬣闢鴻濛凡介常鱗應伏匿
乾坤浩蕩古今浮煙雲咫尺風雷夕葛陂竹化事無憑
豐壤劒沈人已昔琴高跨背亦渺茫子英騎角空騰躑
何如錦鱗三月春桃花浪暖迷雲津天下蒼生望霖雨
一朝變化蘇呻吟

題魚荷卷

明林環

江天向晚煙漠漠萬頃平波澹寒綠敗荷經雨翠蓋傾
細行牽風青縷弱碧空倒影浸琉璃隊隊纖鱗游碧落

雪晴時逐白浪翻月明靜帶浮光躍君不見層臺嵯峨
臨水頭何人更復被羊裘又不見磻溪春深芳草多只
今渭水空東流感予亦有鷗鳥興滄浪歸夢常悠悠何
當結屋滄江上釣竿長拂蘆花秋

閣學袁侍郎變以朝鯉恭龍兩圖見寄索和朝鯉

宋
魏了翁

物生宇宙間巨細統有宗鱗蟲三百餘厥長維稱龍
滄霧瀰六合神龍闕千重維時赤鯉公坐制纖鱗窮纖鱗

何足言什百來追蹤亦有橫江鱗望洋喪其雄于于圉
圉然等辨殊卑崇一鰕掉頭去忽然若將終三公不易
介誰謂惠不恭魯生陋漢儀商皓嬰秦鋒行吾之所安
匪以驚愚庸又如秦漢後俗學千載同卓哉無極論上
配禹孟功吾言聊自警毋謂惟少通

題畫鯉魚

宋
王庭珪

誰把吳松江剪斷得此鯉魚長尺半曾逢李白過江來
騎上青天遊汗漫

題赤鯉圖

元李祁

風翻雷吼動乾坤
赤鯉騰波勢獨尊
無數閑鱗齊上下
欲隨春浪過龍門

爲王侍郎題鯉魚圖

明丘濬

世間萬類水族多
鯨鱣鮪蛟黿鼉就中赤鯉公最貴
三十六鱗如星羅
陽鱗九九陰六六
雖稟魚形有龍骨
禹門寧肯點額歸
鯨海終須揚鬣出
誰哉貌此化龍姿
丁紋錦片光陸離
淵潛一躍勢直上
波濤起立雲下垂

太平時世無蘋尾悠悠洋洋安所止江湖處處皆恩波
於物常如靈沼裏

畫躍鯉送人

明徐渭

鱗鬣不如點額歸丰神却覺有風威不添一片龍門石
方便凡魚作隊飛

鰕魚圖

爲掌教謝
先生作

明李東陽

泮池雨過新水長江南鰕魚大如掌沙邊細行時吐吞
水底行雲遞來往其間種類多莫辨短者如鍼細如綫

三年養得鱗甲成，萬里空嗟畫圖見。
一官薊北復巴西，丹青不改鬢成絲。
遙憐天路飛騰地，長記春風長養時。
宦途萍水紛無迹，再見此圖三歎息。
遠行珍重寄雙魚，魚中定有長相憶。

趙子昂鰕圖

明何璫

曾聞魚藻頌皇都，見說杭城殿閣無。
却想王孫揮筆處，也應回首念西湖。

題一鯖百鰕圖

爲李同寅作

明范嵩

長江春暖水草稠遊魚隊隊沉還浮道然自得不受餌
寄語漁郎莫網鉤大者如鯢勢縱壑溟海飛出崢頭角
煦沫爲雨氣爲雲槁者以蘇耕者樂太平天子居九重
深山窮谷歌年豐此魚變化固難測誰謂渠在凡鱗中

題柯行所藏秋水纖鱗圖

明顧璘

伊誰掇取瀟湘水鋪向長縑光瀰瀰碧牽文藻舞風柔
黃落衰荷抱霜死中添淡墨爲羣魚魴鱖瑣細各自殊
纖毫尾鬣空明見萬里江湖氣勢舒姑蘇野老困奔走

震澤扁舟落誰手展圖漠漠雲水生便欲垂鉤挂魚口
君失此圖何許年完璧再返非徒然請君袖取入京國
天邊時一賞林泉

海鰕圖

明王鏊

茫茫大海浮穹壤日月升沉鰲背上其間物怪何所無
海馬天吳大如象有魚如屋蟹如帆鰕最細微猶十丈
鬚鬚怒氣鬚如戟力戰洪濤欲飛出江湖魚蟹總蜉蝣
觸眼平生未曾識畫工何處寫汝真夢中曾到長鬚國

黑風吹海浪如山魚龍變化須臾間從龍願作先驅去
去上青天生羽翰

畫鰕

明周用

霧雨蘆根細泥沙岸脚平捋鬢登曲筇露頂送香羹

題畫鰕

明程敏政

長鬚衝破荇芽青湖上風來水氣腥喜見天機歸畫史
不將新味付庖丁

依韻和原甫廳壁錢諫議畫蟹

宋梅堯臣

諫議吳王孫特畫水物具至今圖寫名不減南朝顧濃
淡一以墨螯殼自有度意將輕奈謨殆被螭蜺誤

宋徽宗畫蟹

元馬祖常

秋橙黃後洞庭霜郭索橫行自有匡十里女真鳴鐵騎
宮中長畫畫無腸

題蟹

元陳高

昔年作客到淮陽飽食霜螯一尺長幾度淮西橙子熟
樽前空對菊花香

題蟹

二首

明劉基

殼關犀函手關兵沙堤潮落可橫行稻根香軟蘆根美
未覺江山酒興生

擁劍橫行氣象豪渾疑縑素是波濤能令吻角流饒沫
莫向牕前啗老饕

畫蟹

明錢宰

江上尊鱸不用思秋風吹破綠荷衣何妨夜壓黃花酒
笑擘霜螯紫蟹肥

題蟹

明 王世貞

唆喋紅蓼根雙螯利於手橫行能幾何終當墮人口

題畫蟹

明 徐渭

誰將畫蟹托題詩正是秋深稻熟時飽却黃雲歸穴去
付君甲冑欲何爲

魚鰕螺蟹

明 徐渭

魚鰕螺蟹藻萍鮮一盃新醪一柳穿不是老饕貪嚼甚
臂枯難舉筆如椽

蓮龜

宋蘇軾

半脫蓮房露壓陂綠荷深處有游龜只應翡翠蘭苔上
獨見元夫暴日時

黃荃龜藏六圖

爲張左丞賦

元元好問

無心舒卷付皇天不幸剗腸亦偶然世上疑謀待君決
可能藏六便安全

龜蓮圖

元劉因

龜約蓮香上翠盤四靈長向畫中看題詩記我千年恨

風月無聲洛水寒

靈龜篇題馬尊師所畫芝龜

為陳渭
叟作

元揚載

蒼龜生中山深阻絕中道不飲亦不食靈和中自抱噢
咻凝神液巖上產芝草支干集五采相射顏色好彼遊
江海上作計苦不早一罹豫且罔性命莫能保歸遺宋
元君天意資探討築宮修祠祭相承以爲寶神者固如
斯遺骨易枯槁古聞蒙莊氏苦語欲相曉持爲衛生經

千載長不老

題蚌蛤圖

明
吳寬

江湖極目渺無涯
蚌蛤隨潮上淺沙
開口自甘濡沫老
聒人偏恨是鳴蛙

御定歷代題畫詩類卷一百九

欽定四庫全書薈要

御定歷代題畫詩類卷一百十目錄

花鳥合景

徽宗花鳥圖

元王惲

吳中女子畫花鳥歌

元虞集

花鳥圖

明岳正三首

李少參宅林良花鳥圖

明顧璘

題花鳥

明顧清

題僧人花鳥扇頭

明汪淮

松雪花鳥圖

明文徵明

題黃荃畫翎毛花蝶

宋蘇軾二首

題花竹翎毛

元陳高三首

題邊文進花木翎毛

明楊榮

題花木翎毛畫

明葉子奇二首

題梅花雪雀

宋賀鑄

題邢公達寒梅凍雀圖

元元好問

梅雀扇頭

元劉因

疎梅寒雀圖

元王惲二首

寒雀梅

元歐陽玄

題宋徽宗梅雀圖

元柳貫

煙梅睡雀墨戲

元張雨

題從子倫畫風梅花鴨

元陳基

紅梅翠竹山雉圖

元王冕

題從子倫畫梅花家兒

元鄭東

題梅上雀

明陳憲章

題寒梅凍雀

明金幼孜

孫癡寫雪梅鵲兔

明林俊

題雙雀梅花扇

明王世貞

題梅花小禽圖

明劉基

梅竹雙禽

明夏原吉

杏花白鷗

宋蘇軾

繁杏錦鳩圖

元王惲

題杏花鬪鵲

元陳基

題杏花鬪鵲

元張遜

杏花鵲

元郭翼

題士宣杏花雙喜

元鄭東

題李遂卿畫春鵲杏花

明張以寧

杏花飛燕圖

明高啓

題宋徽宗杏花錦雞圖

明孟洋

杏花畫眉

明劉泰

杏花畫眉

明錢遜

杏花燕子

明沈周

題杏花鸚鵡

明張鳳翼

錢舜舉桃花黃鶯圖

元王恽

王中甫桃花鵝鵝圖

元貢師泰

桃花鸚鵡

元揭傒斯

桃竹畫眉圖

元黃湑

題桃花幽禽圖

元陳旅

桃花雙鳥圖

元貢性之

題桃花十二紅圖

元華幼武

題桃花珍禽畫

明劉崧

題邊文進桃花雙禽圖

明高棟

題桃花白頭翁

明朱經

桃花白頭公

明陳昌

桃竹百禽圖

明陳煒

桃花衆禽

明徐溥

題桃花喜鵲畫

明羅頤

題桃花鷓鴣

明陳鑾

題桃花春禽

明殷雲霄

題徐熙桃花鸚鵡圖

明楊翹

題宋徽宗畫碧桃鸚鵡

明項忠

緋桃黃雀

明程敏

題桃花小禽圖

明僧麟洲

題畫桃桃邊有竹數竿又有鳥集於桃上

明蔣冕

桃花楊柳舞鴨圖

明陸治

柳鷺便面

元唐肅

次韻題柳燕

元陶宗儀

為方思道題畫眉折柳

明陸深

題綠柳紫燕圖

明王褒

綠楊雙燕圖

明高棟

綠楊紫燕圖

明僧文湛

題陳高士所藏冬青枝上白頭翁畫

元戴表元

欽定四庫全書薈要卷一萬九千二百十八

集部

御定歷代題畫詩類卷一百十

花鳥合景

徽宗花鳥圖

元王恽

無逸圖空冷御屏翠香珍羽惜娉婷不思三代池臺樂
感致中和本四靈

吳中女子畫花鳥歌

元虞集

吳中女兒顏色好洗面看花花為悄調朱弄粉不自施

寫作牕間雪衣鳥綠窗沉沉春晝遲半生心事花鳥知
花殘鳥去人不歸細雨梅酸愁畫眉

花鳥圖

三首

明岳正

侍宴歸來簇絳雲夜深冷露透猩裙阿環喚醒紗厨夢
閒拂菱花照宿醺

露染平江翠欲飛波心夜半度靈妃可憐一掬蒼梧淚
拭徧當年舊製衣

姑射仙人跨翠鸞風前環珮響珊珊玉簫吹徹江南意

孤夢回時月正寒

李少參宅林良花鳥圖

明
顧璘

寫生之家不易得崔白以後稱黃荃國朝林良亦神妙
意會物像皆天然何年畫此雙孔雀尾上金錢猶燦燦
疑從五嶺翻然來飛入君家翠綃幕衆鳥瑣屑未辨名
鳬鷺燕雀各有情白晝如喧杜陵宅青春忽近長安城
攀條啄粒相頡頏時和自見萬物昌新蒲淺水雲淡淡
落花飛絮風茫茫高堂展畫感我私却憶先皇臨御時

朝廷無事友朋樂日聽春鳥吟芳辭一從羣盜亂中土
萬姓倉皇執金鼓東邨西落少人家燕子那尋舊門戶
虬髯將軍才且武一洗羣盜無死所見畫還思熙皞時
題詩却訴流離苦春來百物儻如舊勸君有錢多釀酒

題花鳥

明顧清

邊鸞不起林良老海內丹青合到誰晴日牕間弄沙鳥
楚煙湘樹不勝思

題僧人花鳥扇頭

明汪淮

已悟前身是法王
謫來塵世幾滄桑
維摩真諦傳青鳥
銜入珠林簷蔔香

松雪花鳥圖

明 文徵明

疎篁顫葉風回枯老枝點玉梅花初韶華暗度人未識
幽鳥得氣鳴相呼鳥呼花舞春舒舒彷彿生意當庭除
青紅歷亂粉墨渝坐久始覺開珍圖印文依稀大雅字
知是王孫吮筆餘王孫玉雪天人如寫生不數江南徐
高齋日暮松雪暗野亭何處鷗波虛百年手跡誰與辨

一笑且看行間書

題黃荃畫翎毛花蝶

二首

宋蘇軾

短翎長喙苦喧卑，
曳練雙翔亦自奇。
賴有黃鸝鬪嫵好，
獨依蘚石立多時。

綠陰青子已愁人，
忍見東風燕麥新。
惆悵劉郎今白首，
時來看卷覓餘春。

題花竹翎毛

三首

元陳高

梨花沐雨帶嬌羞，
獨立枝間一鳥幽。
若遣美人初睡起，

定應無處著春愁

乾坤寥落歲將闌
竹葉梅花獨好看
可惜幽禽棲不穩
霜風日暮羽毛寒

棠梨三月吐花齊
布穀飛來樹上啼
想見小園微雨過
春光多在石欄西

題邊文進花木翎毛

明楊榮

翠袖逢春自不寒
湘江雲散水漫漫
飛來青鳥知何處
誤作仙源樹裏看

題花木翎毛畫

二首

明
葉子奇

海棠花未開枝上春禽語東風幾何時滿地飛紅雨
濛濛花上霧五月海榴紅幽禽哢晴晝葉底聽惺忪

題梅花雪雀

宋
賀鑄

春雪霏霏晚梅抱枝寒雀毳毵隴下有人腸斷為銜芳
信東來

題邢公達寒梅凍雀圖

元
元好問

褐衣相媚不勝情只許乾暉畫得成却被詩人笑寒色

一枝風雪可憐生

梅雀扇頭

元劉因

月影波光淡有春
秋風草草最愁人
憑君欲寄調羹信
恐被枝頭凍雀嗔

疎梅寒雀圖

二首

元王惲

苦愛梅花結素緣
野莊曾次本蕭然
枝頭凍雀何為者
時許分香到夢邊

長記扁舟過武夷
仙家梅竹滿清溪
山禽盡日憐幽致

爭棟寒枝趁晚棲

寒雀梅

元 歐陽玄

斗柄初開第一枝
遊蜂寒雀已先知
相逢不忍輕飛去
直與梅花了歲時

題宋徽宗梅雀圖

元 柳貫

雙雀飛來曉色勻
宮梅如雪鬪清新
紆干山下他年見
青鳥司花不是春

煙梅睡雀墨戲

元 張雨

珍偶偏憐瓊樹寒香漠漠紛紛誰見羅浮月黑一枝同
夢梨雲

題從子倫畫風梅花鴨

元陳基

溪山風日兩相宜更著文禽泛綠漪自愧無才似山簡
為君題作習家池

紅梅翠竹山雉圖

元王冕

游絲冉冉游雲暖翠石凝香上花短管絃不動白日遲
可是江南舊亭館湘簾隔竹翠雨濃玉肌醉染臙脂紅

文章羽毛亦自好轉首似覺懷春風去年我過長洲苑
落日澹煙芳草淺滄浪池畔野景生姑蘇臺上離情遠
今年放棹游西湖西湖景物殊非初黃金白壁盡塵土
朱闌玉砌荒蕪蕪東園寂莫西園靜梧桐葉落銀牀冷
十二樓前蛛網縣見畫令人發深省

題從子倫畫梅花家冕

元鄭東

池上花開如白雲碧波鷺鴨動成羣擬開草檻供垂釣
日日春晴共汝分

題梅上雀

明 陳憲章

覆車剩有粟，噴啖相呼樂。
愛此一枝春，忍飢不忍啄。

題寒梅凍雀

明 金幼孜

繁蕊初開滿玉條，碧梢低亞影蕭蕭。
天寒凍雀雙棲穩，却怪朝來雪未消。

孫癡寫雪梅鵲兔

明 林俊

陰風生峭寒，晴江帶冥漠。
山鳥寂無聲，天花住還落。

題雙雀梅花扇

明 王世貞

東厨殘食競飢鴉西舍飽蜂喧晚衙豈是中庭無滯穗
皎然雙雀坐梅花

題梅花小禽圖

明劉基

三鳥翩翩海上來一雙飛去入瑤臺可憐鍛羽空山裏
獨立寒枝怨野梅

梅竹雙禽

明夏原吉

林木無聲雪色殘一枝晴玉倚琅玕雙禽何處棲來晚
重拂金衣度歲寒

杏花白鵲

宋蘇軾

天公剪刻為誰妍，抱蕊遊蜂自作團。
把酒惜春都是夢，不如閒客此閒看。

繁杏錦鳩圖

元王惲

繁杏梢頭淑景新，錦鳩呼雨雨初勻。
儘堪活色生香裏，擁頸雙棲過一春。

題杏花鬪鵲

元陳基

爾鵲莫逐朝飛雉，雙雌爭雄俱鬪死。
爾鵲莫逐營巢燕。

吳宮失火難相見，飲啄不離碧山阿。
棲止還依嘉樹柯，王孫縱有黃金彈。
紅杏花間奈爾何。

題杏花鬪鵲

元張遜

公子宅前紅杏林，疆疆雙鵲鬪春心。
一從訛尾東風裏，明日深閨問好音。

杏花鵲

元郭翼

溪上好鵲賓相呼，雪一羣柳根春水暖。
來泛杏花雲。

題士宣杏花雙喜

元鄭東

移時山鳥鬪芳叢深院佳人晝睡濃起立階頭驚碧草
不緣風雨落春紅

題李遂卿畫春鵝杏花

明張以寧

高堂暮冬見杏花的皪滿樹開丹砂生香麗句曉浮動
春風夜到仙人家名園題詩昔時見曲江煙晴江色變
兩鵝新乳出花間白雪紅雲光眩轉野人愛酒兼愛鵝
持酒尋常花下歌客中看畫色惆悵春風爾來獨奈何

杏花飛燕圖

明高啓

雙飛如鬪捷終日幾西東尾拂花梢露身翻柳絮風入
簾時趁蝶歸壘每銜蟲何處長相見佳人院落中

題宋徽宗杏花錦雞圖

明孟洋

北風十月登華堂堂上春光照花樹雪壁熒熒絢綺霞
晴煙拂拂流香霧彩筆誰將奪化工珍禽豔萼披霜素
洛陽殿前仙杏開錦雞石上矜毛羽出羣畫手近代無
趙宋徽宗為此圖規規摹寫不足數生意真與乾坤符
煙枝露蕊宛堪折戢翼回頭如有呼上林韶華竟何似

滿堂醉眼俱模糊國朝畫者稱林良古松蒼鷹乃所長
後有呂紀善畫鳥形象雖工神色少帝王妙思非等閑
意態不在丹青間定知萬里胡沙外貌得關河北鴈還
隔窗催起畫眉人

杏花畫眉

明
劉泰

杏花畫眉

明
錢遜

紅杏花開好鳥啼章臺走馬未歸時螺青鈿合蛛絲滿

誰畫春山八字眉

杏花燕子

明沈周

杏花初破處新燕正來時紅雨裏飛去烏衣濕不知

題杏花鸚鵡

明張鳳翼

不言桃李掩殘妝回首春風欲斷腸何物人前偏解語
杏花叢裏綠衣郎

錢舜舉桃花黃鶯圖

元王惲

金衣公子絳桃芳飛下喬林過錦江細按玉琴能巧轉

絳紗高捲薛濤牕

王中甫桃花鵝鵝圖

元貢師泰

朱桃春畫妍綠竹晚色淨雙禽落清池愛羽時弄影伊誰誤天巧麗彩賦姝靚開圖對華尊式慰今夕永

桃花鸚鵡

元揭傒斯

嶺外經年別花前得意飛客來呼每慣主愛食偏肥才子憐紅紫佳人學綠衣狸奴亦可怕莫是戀芳菲

桃竹畫眉圖

元黃潛

說盡春愁貌不成翠深紅遠若為情江南有客頭空白
腸斷東風百轉聲

題桃花幽禽圖

元陳旅

金塘花竹灩春紅枝上幽禽弄暖風莫把殘英都蹴盡
無情流水畫橋東

桃花雙鳥圖

元貢性之

茂陵帝子宴瑤池翠管銀笙取次吹王母不來桃未熟
可憐雙鳥立多時

題桃花十二紅圖

元 華幼武

枝上棲禽五色毛
睡酣花氣日初高
江南一覺繁華夢
滿地荆榛叫百勞

題桃花珍禽畫

明 劉崧

山桃花開紅滿枝
珍禽啄花光陸離
嫋嫋欲立不自持
吳堤十里錦作幃
憶曾半醉倒接羅
走馬挾彈歸來時
還見踏翻紅雲飛

題邊文進桃花雙禽圖

明 高棟

詞人工粉墨花底見雙禽青鳥飛來日瑤池春色深亂
紅看欲雨幽吟聽非琴莫到成蹊處金丸滿上林

題桃花白頭翁

明朱經

前度劉郎阻勝遊漫歌風雨替花愁自憐人與春俱老
底事幽禽也白頭

桃花白頭公

明陳昌

小桃花謝又花開閒却當初玉鏡臺為問白頭花底鳥
劉郎去後幾時來

桃竹百禽圖

明
陳輝

原野諳初霽百卉何芳榮
雖雖衆禽鳥得意欣春晴
遷木恣棲息驚枝復飛鳴
於焉林谷態自適天地情
刷羽耀朝彩流音雜風笙
竹垂琅玕實桃豔瑤池英
吾當披此圖三復羨羣生

桃花衆禽

為林教諭題

明
徐溥

碧桃在天上緋桃巖谷中
巖谷深且僻天天自春風
乃知造化恩一一皆至公
衆鳥且有託飛集在林叢
虞羅

既無恙飲啄聊可充人生亦如斯出處當時雍苟或失
其所寧不感吾衷

題桃花喜鵲畫

明羅頤

天台山下客來稀洞底春芳映晚暉雙鵲飛來枝上噪
玉人應訝阮郎歸

題桃花鷓鴣

明陳鑾

瑤池三月正春酣淺綠深紅雨露含莫唱鷓鴣新樂府
座中有客是江南

題桃花春禽

明 殷雲霄

飄泊東南春已去孤帆未足三江路風濤暫泊錢塘潮
雲霧遙看富陽樹尋芳南屏來何遲春花落盡無殘枝
湖上浮鷗背我去巖畔枯梅猶自竒王君持圖開素封
黃鸝紫燕桃花紅似傷晚風嬌不語應識春色來相從
故園花鳥偏憐余三載干戈未有書捲圖還之空歎息
陶家五柳今何如

題徐熙桃花鸚鵡圖

明 楊 翹

海上紅雲日日新
碧鸞無夢識芳塵
金籠不鎖閒鸚鵡
占得春風一段春

題宋徽宗畫碧桃鸚鵡

明 項忠

五國城邊掩淚時
汴梁宮闕已無遺
爭如鸚鵡知春色
獨占東風第一枝

緋桃黃雀

明 程敏政

雨後薰風不動塵
名園生意逐時新
嚙林黃鳥聲全變
結子紅桃色半勻

題桃花小禽圖

明僧麟洲

簷外雨初晴
幽禽四五聲
桃花無限思
留客看清明
題畫桃桃邊有竹數竿又有鳥集於桃上

明蔣冕

東風庭院夕陽斜
靜對疎篁玩物華
忽見夭桃笑相向
始知春色到寒家

桃花楊柳舞鴨圖

明陸治

二月吳淞水上灘
柳絲風急絮漫漫
詩翁賦罷閑凭處

花滿春池鬪鴨欄

柳鷺便面

元唐肅

新垂柳葉不禁吹鷺語如歌出鳳池
閭闔門西朝退日曾於馬上聽多時

次韻題柳燕

元陶宗儀

溶溶煖綠漾芳堤一握柔絲剪未齊
簾捲東風疎雨歇落花香染定巢泥

為方思道題畫眉折柳

明陸深

中山紫翠護層層合起高樓對雨凭
愛汝一雙花底鳥為春啼殺海棠陵

題綠柳紫燕圖

明王褒

綠柳夏依依差池元鳥飛
蹴花隨別騎銜絮點征衣
隋渚晴煙暝章臺夕焰微
衡門相托久應傍主人歸

綠楊雙燕圖

明高棟

三月白門道垂楊千樹花
君看雙燕子飛去入誰家
門巷失故壘時來拂枝斜
春風更相惜莫與亂棲鴉

綠楊紫燕圖

明僧文湛

紫燕雙雙掠水濱
綠楊嫋嫋不勝春
朱門華屋知多少
認得誰家是主人

題陳高士所藏冬青枝上白頭翁畫

元戴表元

飛高得珍叢青子
飢可食不知何憂愁
二鳥頭已白道人
天機深清齋意相
許賴汝不能鳴一
鳴嫌殺汝

御定歷代題畫詩類卷一百十



總校官庶吉士臣侍朝

校對官庶吉士臣徐如澍

謄錄監生臣陳增